

丁文誠公奏稿

丁文誠公奏稿

卷之十目錄

辦理水師營務查閱輪船海口摺

同治十二年六月初九日

改設登榮水師營制摺

同治十二年六月初九日

修理南旺湖圈隄摺

同治十二年閏六月三十日

籌修鄒縣亞聖廟摺

同治十二年閏六月三十日

查驗師船摺

同治十二年七月二十八日

遵修臨黃大隄請折漕備用摺

同治十二年八月二十八日

請假回籍修墓摺

同治十二年九月三十日

遞陳東省情形因地擇人片

同日

鄆城十州縣鹽務改由官運摺

同治十二年十月初二日

隄工款鉅仍請截漕並撥款濟用摺

同治十二年十月初二日

黃水漫注東境通盤籌畫摺

同治十二年十一月十八日

交卸撫篆回籍摺

同治十二年十二月十三日

恭報到籍日期摺

同治十三年三月二十三日

黔省善後片

同日

銷假起程籲懇

陛見摺

同治十三年九月十一日

回任謝

恩摺

同治十三年十月二十八日

勘辦石莊戶決口豫籌工需摺

同治十三年十月二十八日

湖河一帶添設礮船片

同日

辦理水師營務查閱輪船海口摺

同治十二年六月初九日

奏爲辦理新立水師營務分別裁留兵丁分營操練並查閱輪船暨周歷西北海口各情形恭摺仰祈

聖鑒事

臣

於五月初八日將出省赴登州籌辦水師輪

船各緣由恭摺陳奏在案

臣

出省後於五月二十日行抵

登州府城卽將先期調齊之文登營暨前後兩營水師兵丁除前經調撥煙臺操練洋槍隊及同治元年奏撥新設濮州營暨陸續裁汰未補各兵不計外共計三營戰守兵六百零六名詳加校閱其槍礮打靶均未能一律如式次日復閱水操所有入水演練之兵惟後營尙有八十名前營暨文登營每營不過三十名技藝旣未見精熟泗水亦

不能耐久此皆緣東省師船久壞故營務日就廢弛臣於校閱之下卽將槍礮無準及老弱各兵全行開除合計三營共革退戰兵一百零四名守兵七名此外計挑留戰兵四百三十一名守兵六十四名合計共戰守兵四百九十五名先行照章分撥登州水師營戰兵一百九十名榮成水師營戰兵一百九十名登榮兩營水師統領副將營五十一名其守兵六十四名亦經照章飭派分防膠州汛管帶舢板礮船五十名餘守兵十四名分撥登州榮成兩營各五名登榮兩營統領營四名以資差操查水師兵丁與陸營不同應以泅水演練爲上槍礮中靶次之刀矛牌手又次之現雖師船未到而兵丁已經挑選有數自應先行

操練刻因文登營副將劉蔣華辦事昏憤不能得力臣飭調濮州營遊擊李楹暫署登榮協副將督同前任水師前營遊擊李揚威後營遊擊楊萬春督飭該弁兵等於分營之後卽在水城按期督練並嚴定操練章程賞罰條規逐日認真照辦惟查此次原奏登州榮成兩營暨統領登榮兩營水師共應需戰兵七百名守兵一百名現計除挑留戰守兵四百九十五名外尙短戰兵二百六十九名守兵三十六名此次短缺兵數係從前抽調綠營各兵赴煙臺教練洋槍隊文登營挑去戰兵三十四名守兵二十六名前營挑去戰兵二十八名守兵十五名後營挑去戰兵三十四名守兵三十三名通計共挑去戰守兵一百七十名

此時若將該槍隊調回水師則現短兵數僅一百三十五名尙難募補惟思此項水師戰守各兵挑歸槍隊教練迄今已閱五年一切演習陣法施放槍礮頗覺整肅茲若再改歸水師則煙臺槍隊又缺額一百七十名必須另在各陸營挑補一經另挑則新兵操演洋槍旣須從新學習而前此操練已熟之槍隊復歸水師又須另行教練是彼此互易之間實與招募新兵無異似不如將從前挑歸槍隊之水師各兵仍留槍隊以資熟習而於現辦水師缺額之三百零五名除留一百五十名俟粵東雇來水手考選充補外其餘一百五十五名應盡數另行選募沿海習水之人充補庶兵丁不致改操可免曠日廢時之慮第該三營

兵丁現在營制既改一經另募補充則撥入洋槍隊各兵無營可歸其操練槍隊每月應領水師坐糧亦無從請領自不能不爰爲籌計臣復查從前登中登右兩陸營裁去老弱守兵共計一百五十名文登營裁汰守兵七十五名刻均尙未募補現擬將此項挑歸洋槍隊之水師戰守兵一百七十名撥補登中登右兩營裁汰未補之守兵一百五十名以符原額其餘二十名卽以撥補文登營裁汰未補守兵之數雖該三營水師之兵挑歸槍隊戰兵多而守兵少與陸營裁汰之數盡係守兵以此補彼似覺未能符合然該水師兵丁此時所練皆係步下槍礮卽一律改戰爲守亦頗相宜不過每月應領坐糧守兵較戰兵爲少現



時該兵丁等在槍隊內支領月餼章程係除去每月應得坐糧再由海關加增津貼今一旦改爲守兵底餼自必短絀月餼卽不能足數自應仍由海關道查明每月短絀若干另行酌量籌款貼補以符原定槍隊口糧之數年終核實造報如此一轉移閒於餼項旣無出入而水陸兵丁均可藉資熟手至臣前次奏定酌議新增津貼口糧卽在裁減各兵一切餼項內估計支銷係按水師三營原額戰守兵一千三百一十一名餼項計算茲查同治元年添設濮州一營奏撥水師三營戰兵十八名守兵四名將來水師兵餼仍照原額支領則通省核計又增出戰守兵二十二名於餼項不無增添臣查濮州一營亦尙有裁汰老弱兵

丁未經募補日後募補時卽少補戰兵十八名守兵四名

以抵水師三營前撥該營兵數俾符定制至該營兵丁

臣

已布置畫一粵東所造師船四月底雖已放洋海面空闊  
風信難期刻尙無抵東准信現時屆小暑伏汛已至鄆城  
河隄防護極關緊要兼南漕業已入運籌護亦均喫緊

臣

未便株守現兵丁已挑選成數遴委將弁督飭操練將來  
船隻抵東但須分營上船別無他務似亦不必久候適閩

省調來輪船到登

臣

因親赴該船逐一查看製造堅固器

機靈活頗爲精實因思東省西北一帶洋面與天津毗連  
關係最要且東北海口卽係東省鐵門關爲黃河入海之  
區亦爲東省極要門戶必須親往查看庶海疆形勢可以

周知因卽乘坐該船於二十九日由登州放洋周歷長山廟島黑山等處復由黑山島迤西向北直入大洋沿天津交界一帶轉西行至東省海口距黃河口尙數十里輪船已不能行臣復換坐該船舢板沂海上行四十餘里始見黃水而舟行愈上水勢愈淺至將近河口之處回視黃水高出海面約計丈許再行十餘里兩旁始見岸崖卽係黃河正道臣又換坐熟諳水路民船上駛五十餘里至關王廟測量河水僅中流一路左右十餘丈水深尙有七八尺及丈餘不等餘則深不過三四尺淺或一二尺操舟非熟悉之人時虞擱淺又由關王廟上行四十餘里始抵鐵門關口兩岸逼窄水面至寬不過四五十丈窄或三四十丈

計自河口至關約計一百二三十里不惟輪船萬不能入  
即土著民船行駛亦屬不易信爲東省海疆第一要口也  
惟黃河之沙漸積漸高將來恐水勢不能暢流入海或不  
免倒灌之慮臣於到關後卽由利津一路陸行於六月初  
三日抵省所有辦理水師營務及查看輪船並周歷海口  
河口各情形謹恭摺具奏伏乞

皇上聖鑒訓示謹

奏

改設登榮水師營制摺

同治十二年六月初九日

奏爲文登水師三營遵章改設登榮水師二營現已布置就緒先將大小員弁逐一考驗委署敬繕官職員名清單祇呈

御覽恭摺奏祈

聖鑒事竊臣前因整頓登州水師請將舊設文登水師三營改爲登州榮成水師二營酌變營制裁減兵丁優給津貼口糧並委員赴粵製造師船駕駛來東責令認真練習均經奏蒙

俞允在案茲臣親抵登郡調集文登水師三營將弁逐一悉心考校當遵奏定章程將原設文登協水陸副將改爲

統領登州榮成兩營水師協副將水師後營遊擊改爲管帶登州水師營遊擊水師前營遊擊改爲管帶榮成水師營遊擊文登水師營原設守備一員改爲登榮水師協管帶左哨兵船守備千總一員改爲登榮水師協管帶右哨兵船千總水師後營原設守備一員改爲登州水師營管帶中哨兵船守備千總一員改爲登州水師營管帶前哨兵船千總把總三員改爲登州水師營管帶左右後各哨兵船把總水師前營原設守備一員改爲榮成水師營管帶中哨兵船守備千總一員改爲榮成水師營管帶前哨兵船千總把總二員改爲榮成水師營管帶左後各哨兵船把總又以文登水師營把總一員改爲榮成水師營管

帶右哨兵船把總水師三營原設外委十三員額外外委十一員今裁去外委六員額外外委四員酌留外委七員額外外委七員內外委一員改爲膠州協防管帶頭號舢板外委二員改爲登榮水師協分防外委二員改爲登州水師營分防外委二員改爲榮成水師營分防外委其額外外委七員內一員改爲膠州協防管帶二號舢板額外外委二員改爲登榮水師協分防額外外委二員改爲登州水師營分防額外外委二員改爲榮成水師營分防額外外委新改各缺臣卽於原設水師三營員弁中詳加考察才具技藝實於水師相宜者先行分別委署惟文登協水陸副將劉蔣華辦事昏瞶難膺斯任現查有陸營濮州

營遊擊李楹樸實勇幹紀律素嫻從前曾在軍營管帶礮船於水師操練尙爲熟習當卽委該員署理統領登榮水師協副將又榮成水師營管帶右哨兵船把總一缺水師三營中亦不得其人就近選得登右營額外外委陳國祥熟諳水性技藝優長卽委該員署理榮成水師營管帶右哨兵船把總此外自遊擊以至額外皆仍挑委水師員弁署理惟事屬創始辦理尤宜加慎且干把各員均係專管一船責任綦重任使稍不得人卽恐難免貽誤臣此次遴委各員皆係一再反覆考較力求人與缺宜以期修舉廢墜不敢稍涉草率遷就是以干把各員閒有外委署理尙有外委數缺一時揀補乏人容俟操練年餘後知實有操



練得宜之弁照章拔補期免冒濫並請自副將以至外委無論是否本係實缺均一律改爲署理俟操練一年限滿查明著有成效再行分別另行奏咨補實以示慎重而昭覈實臣現已添委辦理營務之候補道陳錦會同該副將李楹照定一切教練新章嚴飭弁兵認真操演一俟師船到東卽行上船照常練習臣仍當隨時嚴加稽查不令稍涉廢弛謹將改設登榮兩營水師官職並委員大小各員弁等敬繕清單恭呈

御覽除前撥水師三營學習世職人員及現在裁缺外委額外外委其可造者均已分別改撥陸營照例咨部辦理並將廢弛營務之將備另行奏參外理合恭摺具奏伏乞

皇上聖鑒訓示再文登水師營把總一員

臣

前次奏改營

制未經議及查水師前營額設把總僅止二員現將水師前營改爲榮成水師營尙短管帶把總哨官一員是以將文登水師營把總改爲榮成水師營管帶左哨兵船把總以補足奏定把總六員之數合併陳明謹

奏

謹將改設登州榮成兩營水師官銜並現在委署員弁敬繕清單恭呈

御覽

改設統領登州榮成兩營水師協副將一員現委濮州營遊擊李楹署理

改設登榮水師協管帶左哨兵船守備一員現委本任水師後營千總王成署理

改設登榮水師協管帶右哨兵船千總一員現委本任水師前營額額外委陳廷樸署理

改設膠州協防管帶頭號舢板外委一員現委本任水師後營外委柳玉樹署理

改設膠州協防管帶二號舢板額外外委一員現委本任水師前營額外外委李鶴齡署理

改設登榮水師協分防外委二員現委本任文登水師營外委曲殿魁署理一缺因揀選乏人容俟練習一年再照章揀選拔補

改設登榮水師協分防額外外委二員現委本任水師前營額外外委王名業水師後營額外外委趙永順署理

改設管帶登州水師營遊擊一員現委本任水師前營遊擊李揚威署理

改設登州水師營管帶中哨兵船守備一員現委本任水師後營千總白永章署理

改設登州水師營管帶前哨兵船千總一員現委本任文  
登營水師把總曲中和署理

改設登州水師營管帶左哨兵船把總一員現委本任水  
師前營外委曲成德署理

改設登州水師營管帶右哨兵船把總一員現委本任水  
師後營外委應登元署理

改設登州水師營管帶後哨兵船把總一員現委本任水  
師後營把總李九如署理

改設登州水師營分防外委二員此二缺因揀選乏人容  
俟揀習一年後再照章揀選拔補

改設登州水師營分防額外外委二員現委本任文登水

師營額外外委李保興劉志賢署理

改設管帶榮成水師營遊擊一員現委本任水師後營遊擊楊萬春署理

改設榮成水師營管帶中哨兵船守備一員現委本任水師前營守備李國安署理

改設榮成水師營管帶前哨兵船千總一員現委本任水師前營千總白正有署理

改設榮成水師營管帶左哨兵船把總一員現委本任水師前營把總王長齡署理

改設榮成水師營管帶右哨兵船把總一員現委本任登右營額外外委陳國祥署理

改設榮成水師營管帶後哨兵船把總一員現委本任水師前營把總辛永芳署理

改設榮成水師營分防外委二員此二缺因揀選乏人容俟練習一年後再照章揀選拔補

改設榮成水師營分防額外外委二員現委本任水師後營額外外委徐殿魁高成方署理

修理南旺湖圈隄摺

同治十二年閏六月三十日

奏爲籌款修理南旺湖圈隄工竣委員驗收一律鞏固恭摺奏祈

聖鑒事竊查南旺一湖爲南北通運之脊地居濟甯嘉祥汶上臨清衛周圍修築圈隄所以宣洩運河盛漲之水關係運道甚重自軍興以後年久失修兼以黃水灌湖以致各隄悉遭衝缺湖心淤墊過高當此規復河運之時亟宜趕緊修理因查前署兗沂曹濟道潘駿文心精力果熟諳河務隨即札飭督率各該州縣衛確切估計需銀三萬一千七百一十八兩七錢五分無可再減若照案攤征則各該屬兵燹水淹之餘民力實形拮据若動支款項則司庫



協撥過多亦屬異常支絀臣於無可籌畫之中因在臨清  
關稅項下設法湊撥解交兗沂道隨時分支並督同認真  
辦理經臣附片奏

准在案茲復據該道稟報各州縣衛承修各起工段一律  
先後告竣臣復札行藩司委員切實驗收覆稱均係按照  
原估高寬丈尺土工則夯硤堅實石工則堆砌整齊實無  
草率偷減等情前來臣覆查無異除分飭各將用過工料  
數目卽速造冊咨部核銷外所有修築南旺湖圈隄工竣  
驗收緣由理合恭摺具奏伏乞

皇上聖鑒謹

奏

籌修鄒縣

亞聖廟摺

同治十二年閏六月三十日

奏爲鄒縣

亞聖孟子廟年久失修傾圯過甚現在趕緊籌款修葺恭摺奏祈

聖鑒事竊查鄒縣

亞聖孟子廟自乾隆三年發帑大修之後迄今一百三十餘年從未修整其間不過隨時粘補設法鉤摺近年更因戎馬倥傯庫儲支絀怵於費繁工鉅力與心違遂致

亞聖殿以下各處梁欂傾廢瓦片脫落牆垣坍塌更甚於前勢難再事延緩且曲阜

至聖先師廟現在輪奐重新此項廟工自應以次遞及迭

經鄒縣知縣稟請興修

臣

卽於上年飭派大員前往督同

該地方官確切勘估正在查辦間適值連日大雨滂沱

亞聖正殿七間自大脊以下全行坍塌到地木瓦概行砸

毀中三間坍於殿外東西兩間坍於殿內其餘各工亦多

傾圮隨經飭令趕緊確估一面行司籌款一面鳩工庀材

旋據印委各員稟覆正殿七間上下蒙頂應全行揭蓋椽

櫨應一律揀換以期持久此項工需最爲繁重此外如寢

殿東西兩廡承聖門碑亭二座東西兩便門天震井焚帛

池啟聖殿祧主祠致嚴堂致敬門知言門養氣門泰山氣

象門櫺星門繼往開來牌坊二座週圍大牆並

述聖廟大殿兩配房碑亭大門並廟外東北角河岸一道

又斷機堂三遷祠曝書臺洗硯池各等工均須一律修理  
統核甄瓦木石灰泥竹麻金鐵彩畫油飾等項工料屢經  
核減力求撙節共估需實銀一萬七千八百八十六兩六  
錢八分五釐方可舉辦查東省本有廟工生息一款係由  
征收北運引票加價項下均勻貼補而各處帑息甚多不  
能專提此款本年引票甫經開綱所收加價更屬無多頗  
形拮据而工程既經開辦未便因經費不敷或作或輟以  
致日久懸宕因飭運司會同藩司籌款給發解工濟用並  
勒限秋後全工告竣容俟驗收後再將用過工料細數另  
行奏報再廟貌聿新祭器亦宜齊備現據稟報年代久遠  
殘缺頗多已飭令開送數目查核或應修補或應添製需

費若干統俟辦齊附入工程案內一併核實彙案咨部核銷所有

亞聖廟日益傾圯先行籌款興修各情形理合恭摺具奏伏乞

皇上聖鑒謹

奏

查驗師船摺

同治十二年七月二十八日

奏爲查驗粵東購造師船一律堅實現擬將所派駕送官兵資遣回籍並酌留水手以資教練恭摺仰祈

聖鑒事竊

臣

前據候補道李宗岱稟稱該道赴粵購造師

船已於六月二十八日全數由煙臺帶赴鐵門關候

臣驗

收當經奏報於七月初九日出省查驗在案

臣

於十四日

行抵鐵門關以該師船喫水較深內河不能行駛停泊於

河口海外

臣

於十五日出海逐一查驗所有該銅底兵船

十四號及隨船大小舢板二十八隻均屬製造合式尺寸

亦比原奏章程各加寬長其中木料之精堅器械之齊整

實爲近時師船所罕見至於所購槍礮除鐵礮而外尤以

克虜伯所製後鎗鋼礮爲利校閱雇募各水手一切上桅  
泅水施放槍礮技藝並皆精熟臣伏查東省水師久經廢  
弛前次赴登業經挑選兵丁嚴飭加緊操練今有此堅船  
利礮亟應分配乘時練習以期振作惟東省各兵技藝實  
不如粵中雇來舵水人等之精熟現擬將原雇之舵水人  
等三百六十六名全數留東隨時補入兵額以資教習第  
該舵水等技藝既精平時在粵雇價甚優今遠道來東所  
領新定水師兵丁口糧仍屬不敷養贍未肯強留臣現擬  
另行籌捐口糧辦理不動庫中一款按照粵東雇價補給  
俾得資成認真訓練期年之後必可漸成勁旅並請於粵  
東派來弁兵一百一十四員名內酌留水師提標後營都

司銜儘先守備梁肇驤廣州協左營儘先守備唐廷威水師中營儘先守備蘇永祥候補把總鄭延安儘先外委衛鎮江張輝記委目兵王安邦等共七員名歸山東水師作爲候補人員差委如果始終勤奮卽照前次奏定章程准其一體委署拔補各缺以示激勸其餘弁兵臣前經奏明俟抵東時由臣優給川資並代爲籌款搭船遣送回粵現除病故兵丁一名已酌量賞卹外下餘將弁八員兵九十入名已札飭東海關道就近由常稅項下提撥兩箇月口糧以作川資另加給二十日口糧以備該弁兵等沿途風雨阻滯之用並飭雇備船隻妥送回粵以示體恤至此次購造船礮之委員候補道李宗岱承辦鉅工諸臻妥協且



查上兩次東省委員赴粵造船均因辦理不善以致徒糜鉅帑實無一船至東今此次師船十四號大小舢板二十八號工堅料實且皆平安至東器械毫無損失尤爲督率有方相應給予獎勵惟該員官職較大無可議敘可否仰懇

天恩破格獎勵以爲實心辦事者勸至其餘廣東山東兩省管駕各文武員弁遠涉重洋出入於洪濤駭浪之中均能管駕得宜船礮一切毫無傷損亦屬著有微勞可否一併由臣擇其尤爲出力者酌量保獎用昭激勸之處出自逾格恩施再臣驗船後卽於二十四日回省辦理科場事宜合併陳明除將酌留廣東水師弁兵銜名暨造船雇募

水手並發給粵東派護各官弁兵丁來往薪水口分川資  
各經費容俟造冊咨部查照核銷外所有臣出省查驗船  
礮暨遣留員弁兵丁水手各緣由理合恭摺具奏伏乞  
皇上聖鑒訓示謹  
奏

遵修臨黃大隄請折漕備用摺

同治十二年八月二十八日

奏爲遵修曹屬臨黃大隄維持運道民田工鉅費繁請將東省本年漕糧全數折徵以資工用恭摺具陳仰祈

聖鑒事竊

臣

前准部咨欽奉

上諭河流趨重山東自應增立隄防著丁寶楨酌度形勢將張秋利津一帶舊有民堰加培堅固並酌籌款項將侯家林上下民堰仿照官隄辦法一律加高培厚設法防護等因欽此伏查黃水決注東省爲患將二十年運道民田均受其害未至張秋穿運以前本無河形南北汎濫無隄束水以攻沙故停淤易而變遷尤速旣穿運以後雖有大清河河身甚爲狹隘顧今日之尙能容納正以上游容水

之地較多而究其汎濫停淤之病實爲日後無形之大患  
今黃河旣任令由大清河入海所有自張秋至利津之八  
百餘里河槽現尙能容兩岸亦多民堰閭閻利害切身自  
知隨時修補應再嚴飭沿河州縣各就境內董勸增培應  
暫緩另議科條以節經費而免煩擾至張秋以西上游一  
帶水面太寬修治無可著手不論如何設法總屬補苴終  
非長策多用經費幾同浪擲第又有不得不辦之勢就目  
前情形而言年來溜勢在南惟有於近水修築大隄稍資  
防範冀汎水仍注安山一帶藉以濟運與完善之民地略  
可保全而已復查黃水初注東境大溜北近金隄由開濮  
至張秋計不及二百里嗣溜勢南趨先衝決趙王河之紅

川口等處民堰屢堵未就溜勢益趨東南旋又決沮河之  
侯家林民堰上年極力堵合仍恐復決他處因將上下游  
民堰一併增培雖施功至一百十餘里之遙然距與直隸  
交界之處計尙未及半緣漫水向南較遠堰形過於灣曲  
若就民堰舊基合已修未修一律改爲高厚官隄約計將  
及三百里本年伏汎未漲以前臣曾派員查看其西南一  
帶堰外頗有涸出餘地遠近不等若就此灘面取直築隄  
約可省去數十里卽可多保涸復地畝又於逼溜直注安  
山濟運較爲得勢惟築近南之隄取土較易方價似可稍  
廉築取直之隄土性不免帶沙且距溜甚近丈尺倍須高  
厚更有水內施功之處彼此相權工費略等通盤核計土

方工料卽使省之又省亦約需銀一百餘萬兩現在未過霜降水勢尙盛不但取直之灘面尙屬一片汪洋大汛後不知刷深溜溝幾道能否施功卽近南之民堰本年多有漫缺之處其情形若何亦復未能確勘俟冬初水退遴委委員分投勘丈明確將丈尺土方核有定數再行奏明辦理惟是工程尙須詳勘而經費必當預籌向來辦理大工皆係奏請撥款此項改築官隄卽與黃河大隄無異工費約需銀百餘萬兩爲數較鉅本非一省力所能任第現當庫款支絀之際籌撥亦極爲難臣未敢援案陳請祇可先就本省籌畫而東省歲入正款祇有此數奉撥各饒爲數浩繁又無釐金閒款可資挹注惟查漕糧一項如遇本省

急需曾有截留備用成案臣再四思維擬請將本年各屬應徵漕糧全數折解撥充工需計除災緩及薊糧兵米外約起運米不足二十萬石按市價及用費約可折銀四十餘萬兩得此鉅款則工需差及一半有著始可圖成明知京倉攸關緊要何敢遽請截留祇以此項隄工係爲捍禦黃流維持運道工費亦屬要需東省除此別無可籌不得不爲此變通之計惟有籲懇

天恩俯准截留應用俾要工得以及時籌辦尙有不敷之款容俟核明確數臣再於藩運各庫內移緩就急酌量勻湊以期集事抑臣更有請者黃水自銅瓦廂下注由豫直始至東境今東省旣議自荷澤入境改築大隄所有上游

直隸境內必須一併築隄與東境相接始能完密若不同  
時並辦則將來汎漲時水自上游溢而南趨東省長隄同  
於空設工費悉成虛糜應請

敕下直隸督

臣

一體預行籌計以資聯屬而期保衛所有

籌款修築長隄並請截漕備用緣由謹繕摺具陳伏乞  
皇上聖鑒敕部速議核覆施行謹

奏



請假回籍修墓摺

同治十二年九月三十日

奏爲臣父墓被賊掘動叩懇

天恩賞准給假一年回籍設法安厝稍盡烏私恭摺泣陳  
仰祈

聖鑒事竊

臣

服官在外已十餘年從前家鄉變亂音耗不

通上年貴州奏報肅清始得專丁回籍看視三代墳墓茲  
於九月二十八日據家丁來稟

臣

父墓有被賊掘動形迹

臣聞信之下心膽摧裂痛不欲生伏念貴州苗教之亂全

係本地土匪內相殘殺其間挾私爭怨極爲分明所破城  
池村寨焚戮之外凡有墳墓多被毀傷非若他省寇自外  
至不悉地方情形生者卽無可逃死者或倖可免故兵燹

以來被賊之慘貴州尤烈臣自咸豐癸丑回籍遽丁母憂  
卽值下游匪勢猖狂欽奉

文宗顯皇帝諭在籍募勇防勦遏之使不得上竄者閱六  
年該匪積恨切骨已非一日庚申年渥蒙

簡放湖南岳州府知府撤勇赴任

臣

以黔賊未平恐有日

後之患辭家之日盡將

臣

祖父母父母各墓碑撲而後行

私冀倖免報復不料同治壬戌年賊突竄上游分股徑繞  
臣籍廬墓焚燬無遺親族殺戮殆盡屈計臣父墓被掘必

在此時迄今閱十二年矣

臣

父則棺骸久露

臣

則安坐衙

齋捫心內疚無地自容痛念

臣

父生

臣

劬勞未及享

臣

一

日之奉而身後慘遭賊害此時若有軍旅之事尙可援金

革不避之義以自勉今東省幸獲安堵若徇己忘親隱忍貪位則是可忍也孰不可忍自問何以爲人况臣兄弟三人年來相繼死喪僅存臣一身若非親往安厝不惟父子之親責無可貸卽欲分任實別無可屬之人臣自接信以後神魂若失心志昏迷夜每閉目若見臣父慘然不樂兩日以來終夜傍徨惟有悲泣伏維

聖朝孝治天下臣在臣工請假省墓無不渥邀

矜恤况臣遭此變故實臣八子齋恨難言之隱惟有泣懇

天恩俯准臣假期一年並懇

迅賜簡員接任巡撫俾臣立得交卸星馳回籍設法安厝

庶臣父早獲一日之安必當結報泉下臣一俟料理事竣

亦必趕緊銷假重塗肝腦以期仰答

生成

臣

無任迫切悚惶待

命之至所有請假回籍緣由恭摺泣陳伏乞

皇上聖鑒訓示謹

奏

瀝陳東省情形因地擇人片

同治十二年九月三十日

再查東省爲

畿輔股肱緩急胥關緊要近數年來吏治民風漸有轉機  
臣豈不願力求上理稍伸犬馬報效之忱無如肇重災生  
臣致父墓有被賊掘傷情事人子處此痛心疾首計無復  
之不能不泣懇

賞假回籍料理而回念東省情形殆未始不長慮而卻顧  
也竊維爲政在於得人方今人才奮發

聖主明同日月自必

鑒別之獨精第以人才每難兼全而用才亦貴得地現在  
各處亂機甫定凡一應政令張弛大約以熟悉地方情形

爲最要蓋情形熟則利弊審利弊審則措置宜故同一才也人地有生熟之分卽辦事有難易之別東省吏治夸而民氣浮操縱本屬不易近又加以河漕各務叢集一省尤非熟悉地方機宜措施恐難悉協竊見現任布政使李元華廉慎自持實心任事辦理一切亦覺裕如又漕運督臣文彬嚴正沈毅任事果決且自沂州府洊升藩司十年以來官民翕服資望較重現值需人孔亟我

皇上簡拔精當本非臣下所敢妄窺第恐以近

畿爲重勢必因地擇人則如文彬等之熟諳有爲均足以供

採擇臣爲地方得人起見謹附片密陳伏乞

聖鑒謹

奏

鄆城十州縣鹽務改由官運摺

同治十二年十月初二日

奏爲山東省北運鄆城等十州縣鹽務積疲日甚現擬籌借運本督飭委員試辦以期整頓而重課款恭摺奏祈聖鑒事竊查東省嵯網南北兩運互相維繫從前南運引地始以商力疲憊繼以賊匪紛擾十餘年來至於一引不銷竟成廢岸經臣於同治六年將南運商邱等九州縣鹽務委員專辦在案復經隨時體察北運情形疲滯已久而鄆城等十州縣尤甚溯滯銷之由南礙於淮私豫私北礙於蘆私兼各該處地方多係產硝之區每當春夏之交雨水稍缺硝鹽滿地加以奸民刮土淋曬硝戶藉官煎私幾有防不勝防之勢各州縣或商辦或官辦或官包商辦或



覓友代辦參差不齊然皆係資本缺乏雖極力督責均不  
過設法運銷僅顧考成而止於暢銷裕課之道全未講求  
亟應量爲變通設局委員承辦藉資整頓臣與運司再三  
商推東網大局以整頓西南門戶爲先而操之過急未見  
其利徒滋其害祇可徐圖其亟待變通者應以界連直隸  
各州縣自曹州府以北爲斷查曹州東北爲鄆城折而西  
過大河爲濮州又北爲觀城稍東爲范縣又東爲壽張折  
而西北爲朝城莘縣冠縣又裹入直隸界內三面皆係直  
境者爲邱縣附近直界介在臨清德州之間者爲武城以  
上共十州縣內鄆壽范觀朝莘冠邱八縣皆在道光二十  
九年奏請官辦之列濮州武城向由商辦因歷年賠累難

堪自願請歸局辦統計十州縣額引共三萬五千八百四十道現擬統歸委員試辦領銷以運司爲總辦卽在該署設立督銷總局以專責成並派知府一員提調一切事宜十州縣設立分局每處各派一員慎選明白廉謹精於會計者分投查辦均發給木質關防鈐記以昭信守張秋鎮爲轉運收發之區永阜場採買鹽觔雒口局收發鹽包雇船運駛均經分派委員經理並於柘園鎮一帶添設卡座遴委總巡分巡隨時隨地嚴杜蘆私平毀硝池不准稍形鬆懈惟歸委員辦理運本無出卽設立各局子店應製一切墊底器具並委員等薪水辛工火食等項爲費甚繁且因連年黃水北趨異常漲發場竈率被淹浸鹽穰旣形昂

貴運腳亦屬不貲茲由運庫先後籌借銀九萬兩藉資接濟統限三年歸款其領引春運悉遵定章先課後引雜款亦均隨引完納並不准分毫蒂欠惟積疲已久該委員等承辦頗屬不易臣現飭運司明定章程實力考核如不得力隨時撤回若別有侵蝕營私等弊從嚴治罪至該委員等果能潔己奉公俾引暢課充俟二年後著有成效酌核分別請獎庶各有勸懲俾知感奮至照額督銷各該州縣不得辭其責緣禁私緝梟本係地方官應辦之事不得因另委專員試辦意存諉卸每年奏銷考成銷足分數則甄敘墮銷則揭參仍照定例辦理如能拏獲大夥私匪卽給優獎若聽私梟入境不能懲辦卽行嚴參如此認真辦理

或足以振頽綱而衛全局據運司鄭蘭悉心籌議具詳請  
奏前來臣覆查理財以裕課爲先行鹽以疏滯爲要前飭  
運司加意整頓上年銷數雖比前數年較暢仍未見大有  
起色如竟畏難苟安因循觀望不亟思設法整理則日復  
一日勢必引積課懸臣現飭運司督同提調嚴行考核並  
分飭場官及委員等加意妥辦嚴絕弊端由場築鹽以及  
護運秤驗各事宜概照向章辦理其由場運赴各屬水陸  
迭更沿途偷漏灑賣夾私等弊通行查禁其大旨在利  
國便民其大要在禁戢中飽嚴緝各私如果上下一心實  
力辦理事事撙節行之數年雖未敢必轉滯爲暢亦自可  
逐漸獲益蘇困累而裕課源以仰副

聖主垂念東網之至意再南運商邱等九州縣委員督辦時賊氛未靖戶口凋零本屬萬分棘手旁觀卽多私議以辦理未能確有把握日後必致大虧成本者而臣一意孤行百折不回期先難而後易勿進銳而退速始於河南歸德府所屬添派勇巡聯集鄉團嚴密巡緝私梟漸覺斂迹銷數亦頗見轉機繼因安徽宿州爲南運門戶私梟尤甚商人視爲畏途無人承辦近亦改歸委員試辦並派勇營會同地方官緝私從此淮私亦少浸灌上年銷數比前數年已見加增而數年來增添課款亦不下十餘萬奏銷分數亦均能趕足所借運庫本銀五萬兩前已繳還銀四萬七千兩所餘三千兩現在均已如數全完此皆仰叨

福庇得以稍著成效欣幸之餘倍增兢惕謹將實在情形  
縷晰附陳上紓

宸廑除咨部查照外所有籌借運本委員派辦鄆城等十  
州縣北運鹽務緣由理合恭摺具奏伏乞

皇上聖鑒訓示再鹽務事極煩瑣尤須因時變通以後如  
有未盡事宜容臣隨時察度再行奏咨辦理合併陳明謹  
奏

隄工款鉅仍請截漕並撥款濟用摺

同治十二年十月初二日

奏爲隄工鉅款難籌需費較急請將本年漕糧分別兌運截留以資兼顧並懇請撥款俾濟要需恭摺覆陳仰祈

聖鑒事竊

臣

接准戶部來咨議覆

臣

奏准修曹屬臨黃大

隄請將東省本年漕糧全數折徵以資工用一摺同治十二年九月十九日具奏奉

旨依議欽此欽遵到

臣

查原奏內開東省漕數較多轉輸

最近不容輕議改折咸豐同治年間曾暫辦折徵因本省贍軍放賑要需是以從權議准現在京倉粟豆缺乏全賴東省接濟所請全數折徵撥充工需之處礙難議准請飭全徵本色趕辦起運以實倉儲至曹屬隄工關緊緊要應

與上游會商直隸督臣從長計議核實勘估再行奏請籌撥款項分別興修等語伏查漕糧關繫京倉原不敢輕議改折惟現擬修築曹屬隄工係爲捍禦汎濫黃流保護運道民生要務工長費鉅本應奏派撥款祇以部中籌議既屬不易卽由他省撥解緩急恐未能應手萬不得已因先就本省籌畫而東省實別無可籌之款祇有漕糧一項歷有折徵截留成案故有援案折徵撥充工需之請部議以從前折徵之案或因軍務或因災歉事屬從權此次全數折徵截留礙難議准自係爲慎重倉儲起見然以現在黃流日益東趨汎濫彌甚民田被害較廣運道岌岌可危此項隄工所以保護之者實與軍務饟需災區賑款同一緊



要而保運正所以利漕衛民卽所以裕漕更爲以漕濟漕  
事屬一體查東省本年漕糧除災緩及撥運兵米外應行  
運通者不過十八九萬石卽全數折徵將來估計工需尙  
未及半必須另行籌撥今部臣以京倉需用孔殷臣亦何  
敢不籌兼顧思維再四惟有力求變通之法擬請將本年  
漕糧以一半飭徵本色解通交倉以一半照時價折徵銀  
兩解交藩庫撥作工需以資急用如此分別徵運折留在  
倉儲雖少數萬石之糧亦可藉資接濟而要工有所憑藉  
可以剋期舉事似屬兩有裨益至前奏所估築隄道里土  
方約需銀數實係從省計畫雖因水未歸槽尙須確勘而  
旣爲必辦之工卽係必需之款並非事在未定猶可緩圖

且工需約銀一百餘萬兩計漕折尙未及半而應需之料物一切亦須本年及早辦理是以預請截留俾開漕以前早得定議月餘以來水漸消涸臣已節次委員分投確切勘估俟彙齊稟復情形由臣通盤酌核於十月內詳晰具奏年內爲日無多必須一一上緊布置次第興工趕於來年桃汛前後全隄可以告成庶期防範得力惟臣前次奏截全漕計銀將四十餘萬兩不敷鉅款由臣於本省竭力籌維茲折留一半漕糧計數不過二十餘萬則日後工需短絀益多本省萬難遽籌不得不奏請籌撥惟有籲懇天恩俯念要工緊急勅下部臣於近省有著之款先行籌撥銀三十萬兩準於開年二月前解到東省俾濟要需至

上游直隸東明開州各缺口

臣

俟查明確切情形卽移咨

督

臣

李鴻章核辦現已先札該州縣會查具稟惟督

臣

駐

津距大名較遠若俟函商定議再奏誠恐不免稽延而東省地居下游民地則被災甚重運道則大局攸關但使本境有可設法籌辦之處自當竭力設法修防仍移咨李鴻章一體籌畫斷不敢稍涉觀望以仰副

聖主慎重河防之至意所有本年漕糧仍請分別徵運截留並請撥款辦工緣由謹繕摺覆陳伏乞

皇上聖鑒勅部迅速核覆施行再

臣

現在請假此項隄工

自應俟

簡員接任奏明辦理惟工程關係至重且漕糧徵運折留

奏  
必須及早定案以便飭屬遵行更不容再事耽延若俟接  
任之員再行奏辦深恐遲誤是以據實預陳合併聲明謹

黃水漫注東境通盤籌畫摺

同治十二年十一月十八日

奏爲查明黃水上游漫注東境通盤籌畫堵口築隄以資捍衛並分別確核工需詳細具陳仰祈

聖鑒事竊

臣

前將遵議修築曹屬臨黃官隄預籌經費於

兩次懇請折漕備用摺內將大概情形先後具奏在案其時雖以工在必辦然甫過霜降漫水所到之處仍係一片汪洋未能確勘情形遽定辦法且因直東交界處所東明開州荷澤濮州犬牙相錯均屬河身上游本年漫缺不止一處究竟水勢以何處爲最大施功以何處爲最要堵口應在東在直恐州縣或有推諉必須履查確切以免舛錯當經徑札該州縣並遴委道府委員分投確勘去後茲據

各該員先後查明繪圖稟覆

臣

細加考核查黃水前數年

原自荷澤之閻什口濮州之張家支門循趙王河北行民間會於東岸築有小堰稍資防護嗣一決紅川口再決霍家橋大溜東趨河身漸改爲東西形勢南岸濮境逐漸淤高每年大汛時雖稍有串灘之水不甚爲害民間旣未於灘面另立新堰其趙王河東岸舊堰遂已無存本年伏汛黃水來源旣旺雨水又多以致南岸淤灘於六月下旬由開州之焦邱濮州之蘭莊衝漫二處斜趨東南從張家支門南北一帶直抵鄆鉅上年所修民堰漫溢數處其初原祇倒漾之水並無溜勢消退後堰身尙易修整嗣於閏六月七月中旬東明之岳新莊石莊戶民堰先後復決二處

口門較寬約分大河二三分溜勢漫水悉注東南致下游  
鄆鉅被漫之堰兩面受水風浪衝激坍卸日多僅存十之  
五六現在冬初水涸堰基又露出一二分坡水深僅尺餘  
淺或數寸然總無乾土可取欲行補築殊難措手溯查東  
趨之水皆係經過張家支門該處南北雖尙有支流四道  
然寬不過一二十丈深不過三四尺堵塞尙易支流旣塞  
僅存大門口一處計寬八十二丈水深一丈三四尺而兩  
壩有路運料有地取土從此施功可期堵合此處合龍則  
東趨鉅嘉北注鄆城之水自可漸涸應將南路之堰移於  
北面近水灘地則民田運道尙可冀保全惟荷澤之北與  
濮州之南民地被淹尙屬不少復查上游各處民堰缺口

現在多已淤閉惟石莊戶一處口門已寬一百四十八丈水深丈餘若將此處堵合則張家支門之水可期不堵自涸再就北面近水灘地接築長隄卽荷北濮南民地並免水患此則權衡兩處缺口緩急之情也再查石莊戶漫水東趨與北面大河愈分愈遠中間現在涸出灘面東西約百餘里南北自十餘里至二三十里兩溜分歧幾於隔絕若欲堵築張家支門必須於北面已淤之趙王河身挑挖引河導水北去冬令水弱或尙能容並須於未合龍以前自安興墓至霍家橋預築高厚長隄以資捍禦所慮來年汎水漲發自石莊戶至張家支門計程八九十里勢成入裏頂衝北行不暢則此一帶新隄萬分喫重然因此遂不



敢舉辦則來歲黃水分溜東注運道湖河悉成淤墊爲害甚鉅卽張家支門一帶亦將如今年李家樓呂仲剛屯之節節衝刷又復無可施功是張家支門之堵築東省實有不能不辦之勢若能堵合石莊戶則口門本近大河旣不須挑挖引河卽築隄亦得形勢此則辦理兩處缺口難易之情形也故就籌防黃大局而論則必堵石莊戶庶以下施功較易而所裨者甚廣但該口係屬東明界在大河東南地畝爲數無多堵口之受益甚微不堵亦被害非切而工繁費重羣情觀望自係恆情且一縣之民力無多被災之後益形拮据更難期其必辦然使該處口門不辦則東省被淹之民地旣多運道之敗壞尤甚惟有度地置隄急

堵張家支門爲自行保衛之計然臣竊思事在人爲若果有關全局則雖善自爲謀猶不若兼爲人謀爲得計無論  
是直是東總當一體統籌堵合現據勘石莊戶口門寬深  
丈尺合計堵築工費約需銀三十餘萬兩張家支門口門  
較窄而水深兼有支流四道約需工費銀二十餘萬兩如  
同時並辦所費太鉅茲就東省目前辦法必須自行籌款  
專堵張家支門以保運道湖河及鄆鉅汶嘉民地因挑引  
河築大隄兩項必先期早辦一步因循便恐遲誤而荷漢  
之民緊當石莊戶下游害在切身若勸令堵築該處亦所  
甚願但官不爲設法僅恃民力亦無以對閭閻當此經費  
萬難之時臣輾轉思維擬定變通之策由官量爲津貼料

物之需其土方夫工等項仍藉資民力但能委曲勸諭亦自樂於從事核計各項物料約需銀十餘萬兩擬將此項發交該州縣官並派熟悉工程實心任事之大員督率兩邑之民實力辦理如克有成不但石莊戶工需所用者少所省者多卽張家支門應用工需除挑河築隄已經動支外其餘尙可節省惟石莊戶究屬直境自須一併借資直民之力庶東民無可觀望且東明河東被害較多自亦樂從臣已經咨會並函商直隸督臣飭令東明縣曉諭河東居民一體聯絡協助並委員會同東省督率辦理但資其力不用其財庶便集事而節帑費茲接覆咨意見相同並於屆期派委大名道前往該處幫同東省委員督籌妥辦

嚴飭東明官紳多集民夫合力興作以成要工自應照此辦理此又東省議辦張家支門及會合直境兼辦石莊戶之情形也至前議改民堰爲官隄會聲明俟確勘後始能核定道里茲查張家支門堵合則鄆鉅漫水自涸所有南路殘缺舊堰無須修補應於北面涸出灘地更築新隄計五十二里卽臣前摺所稱取直之隄其上年所修民堰一百一十七里應加高培厚者計三十二里其餘八十五里堰前積水可期消涸不須修培惟前議築隄僅至王家垓止現在秋後水涸自王家垓起至運河十里堡西岸止又已涸出灘面爲前次求而不得之形勢應卽就灘築隄直抵運岸計六十四里以保運河四十里及民地數千頃以

上新舊三段隄工計一百四十八里地居下游無論堵張家支門或堵石莊戶皆係必須興辦之工其上游隄身如堵張家支門則應自安興墓起至霍家橋止普築南北大隄計五十三里須趕辦以備缺口合龍又自安興墓對岸起向西接築長隄至直隸交界止約計八十餘里以防南趨漫水因立隄以近水爲主現在漫水日向北涸隄基自難遽定亦尙可稍緩若能堵合石莊戶則亟將此段隄工移於北面灘地近水建築用資捍禦東境計八十五里惟濮州荷澤濱水之處中隔東明開州地段恐直境立隄事宜一時難於定議應先就東省荷澤境內建築遙隄約增三四十里此數段隄工因堵口不同故立隄亦異然兩處

各計一百二三十里合之下游約一百五十里總計不過二百七十八里與前約估之三百餘里尙有減少惟安興墓至霍家橋之五十餘里即使堵石莊戶仍不能省因此時情勢以禦東趨之水爲最重必須預爲修築未便俟石莊戶之工程若何再行趕辦或致誤事此又分別築隄道里多寡之大概也至築隄之費前擬計程三百里約估銀百餘萬兩查道里定始可核土方土方定始可核銀數此項改築官隄捍禦黃流非高厚則工程難恃務高厚則經費不貲酌中估計擬以頂寬三丈高一丈四尺內外兩擔共計五收每丈計土九十一方每里計一百八十丈共土一萬六千數百方灘面築隄略無基址可因取土應就外

灘雖不甚遠而積沙較多必須掘取淤土攪和以期適用  
方價恐不能甚省每里約需銀四千數百兩二百七八十  
里之隄卽需銀一百一二十萬兩因現議添築王家垓至  
運岸一段新隄係近日情形爲前議所未及故工費稍有  
所增加以堵築張家支門及津貼石莊戶約需工費三十  
餘萬兩合計需銀一百四五十萬兩惟現奉部准撥隄工  
銀三十萬兩計所短仍在百萬兩以外山東一省之力斷  
難籌此鉅款卽再行請撥部臣實亦爲難臣通盤酌議應  
仍擬仿照上年修築鄆鉅等縣民堰辦法計里酌給津貼  
稍資民力俾經費略可節省惟上年係官修民堰除侯工  
池北係屬貼近大溜其餘多係漫水故堰身土方不多津

貼甚少民間出力之外仍須捐資此次改築官隄均係逼溜當衝丈尺必須高厚每丈土方比上年不止加倍而民間被水拮据已甚應給津貼必須比上年格外從寬不令如前次之賠累過多但能節省十之一二便可少用銀三四十萬兩在小民利害切身如能委曲諭導卽稍用其力必當踴躍趨事至此項隄身修成後原未設有廳汛並無專管之員若俟定議如何修守尙須時日而大汛卽已經臨年來仍祇可暫派委員督率原修紳民分段防守庶修守仍屬一體不致隔閡此又統籌修隄堵口經費及變通節省之大概也臣維此次河水東趨在東省受害甚深在運道關係亦重此項隄工萬難姑置是以不得不亟圖辦



理雖現蒙

天恩准假回籍未敢因交篆在卽稍涉諉卸凡應行預籌事宜自當悉心核議籌定全局俾後任查照興辦不致誤時至一切辦理詳細章程或黃水形勢變遷以後如尙有必須加增隄工暨酌添經費之處應俟署撫臣文彬到任隨時酌量具奏所有查明黃水漫注東境酌議堵口築隄情形謹恭摺具陳並繪具圖說恭呈

御覽伏乞

皇上聖鑒訓示勅部覈議施行謹

奏

交卸撫篆回籍摺

同治十二年十二月十三日

奏爲

微臣

交卸撫篆及起程回籍日期恭摺仰祈

聖鑒事竊

臣

渥荷

天恩賞假一年回籍修墓毋庸開缺業經專摺叩謝並奉到

硃批欽遵分別咨行在案茲漕運總督署撫臣文彬於十二月十一日馳抵濟南省城當將巡撫及臨清關關防鹽政印信同

王命旗牌文卷等件於十三日委員齋交署撫臣文彬接收臣卽於是日交卸準於十四日束裝起程瞻望

闕廷彌增依戀一俟到籍後謹當料理事竣再行專摺銷

假以遂駑駘報効之忱除循例具題外所有微臣交卸及  
起程日期理合恭摺奏報伏乞

皇上聖鑒謹

奏

恭報到籍日期摺

同治十三年三月二十三日

奏爲恭報

微臣

到籍日期仰祈

聖鑒事竊

臣

渥荷

恩綸賞假一年回籍修墓業將由東交卸起程各日期具  
奏在案茲臣於三月二十二日行抵貴州平遠州原籍目  
睹村落爲墟人民逃散蹂躪實深惟幸地方一律肅清復  
經貴州撫臣曾璧光督同司道籌撥經費嚴飭地方官辦  
理清查招墾各事宜逃民漸次歸復地方亦極安靜堪以  
仰慰

宸廑

臣

到籍後卽將三代墳墓趕緊修理竣事剋期銷假

決不敢藉耽安逸自負

生成所有

微臣

到籍日期謹恭摺具奏伏乞

皇上聖鑒再

臣

此次拜摺係借用貴州平遠州印信合併

陳明謹

奏

黔省善後片

同治十三年三月二十三日

再臣由東啟行經過江蘇安徽湖北湖南各省暘雨應時  
人民安堵堪慰

宸廑入黔後經行上下兩游見防營聯絡匪徒斂迹田土  
亦漸開墾頗有維新氣象到省細問撫臣曾璧光具知籌  
辦善後經費艱難各處城池衙署與夫驛站塘鋪多屬殘  
缺必須次第興修方足以資保障至招徠流亡發給牛種  
等項所費已屬不貲而積欠饟項數百萬各省近以黔省  
軍務甫靖措解或從稍減無多協濟一切尤費補苴臣籍  
隸黔省深知本土瘠貧變亂以來荒蕪更甚仰仗

朝廷威福各直省大局關懷籌軍濟饟撫臣始得董率文

武竭力匡事勉將兩游上下一律肅清然不亟乘此時規  
圖久計爲之罅者補廢者興舉凡子遺之望濟方殷飢軍  
之待哺尤急措置稍緩勢卽岌岌可危且苗性犬羊惟憚  
兵威楚蜀誼切援鄰聲勢素壯川軍因欠餽幾及百萬提  
臣周達武已赴川清釐此項尙不知作何撤留湘軍深紮  
苗疆素倚爲重更不可輕議遣撤溯查雍正乾隆年間苗  
地用兵皆屢煩

天討

聖謨廣運然後邊隅底定歷久相安由昔視今黔省情形  
似須妥籌急辦合無仰懇

恩施格外籌撥鉅款先清欠餽繼整防營因之趕辦善後

惟黔省經此次變亂一切規模事同創始並懇

敕下撫

臣

督同司道嚴飭府縣不拘成例惟期便民一應

興廢破格舉行庶幾生聚可圖危疆永保矣

臣

情切桑梓

偶有所見不敢緘默謹陳愚悃附片具奏伏乞

聖鑒訓示謹

奏



銷假起程籲懇 陛見摺 同治十三年九月十一日

奏爲恭報 微臣 銷假起程並懇請

陛見恭摺仰祈

聖鑒事竊 臣 渥蒙

殊恩賞假一年回籍修墓勿庸開缺業將到籍日期奏報  
在案 臣 到籍後省視祖墓雖閒被損壞幸未大傷當卽趕  
緊修理於六月杪竣事自惟受

恩深重未敢稍涉耽延卽於七月十八日由籍起程銷假  
九月初十日行抵武昌沿途經過四川湖北各地方秋收  
豐稔民情安謐堪以上慰

宸廑惟念 臣 自同治八年入

觀後迄今又逾五載未獲瞻仰

天顏犬馬戀

主之私無時或釋此次銷假惟有仰懇

天恩准臣來京

陛見再行回任俾得欽承

聖訓庶諸事有所遵循不致隕越而

微臣

孺慕私忱亦可

稍伸

臣

於拜摺後卽由武昌取道清江山東一路迎摺北

上恭候

訓示所有

微臣

銷假起程並懇請

陛見緣由謹恭摺具奏伏乞

聖鑒再此摺係借用湖廣總督關防拜發合併陳明謹

奏

回任謝

恩摺

同治十三年十月二十八日

奏爲叩謝

天恩並報

微臣

回任日期恭摺具奏仰祈

聖鑒事竊

臣

於九月十一日在湖北武昌府途次恭摺具

奏銷假並懇請

陛見後再行回任由清江山東一路迎摺北上恭候

訓示十月二十五日在山東濟南府欽奉

硃批著毋庸來見欽此應卽欽遵回任茲於十月二十八

日准署撫

臣

文彬委濟南府知府豫山撫標中軍參將莫

組紳齋送巡撫關防鹽政印信臨清關監督關防暨

王命旗牌文卷前來

臣

卽於是日恭設香案望

關叩頭祇領任事惟念臣材識庸愚渥荷

聖慈優容叨竊東圻已逾七載涓埃未報悚惕滋深茲以  
銷假陳懇

陛見再行回任復仰蒙

殊恩優加體恤凡此

逾格之鴻施實非捐糜所能報臣惟有益加策勵於地方

所有應辦事宜殫竭血誠力圖整頓以冀仰答

高厚鴻慈於萬一所有微臣叩謝

天恩並回任日期謹恭摺具奏伏乞

皇上聖鑒訓示謹

奏

勘辦石莊戶決口豫籌工需摺

同治十三年十月二十八日

奏爲石莊戶決口奪溜南趨局勢全變漫水爲患甚大必須急籌堵築以保大局臣於接篆後卽日前往查勘謹先陳大略情形並請豫籌工需恭摺仰祈

聖鑒事竊查上年秋間東明石莊戶決口漫溢下注東境臣恐日後潰決益甚敗壞大局當於十月查明估辦仰蒙天恩飭部准撥銀三十萬兩其時臣雖已准假修墓仍將

應辦事宜籌議具奏十二月中旬署撫臣文彬到東臣卽

交卸起程回籍茲臣銷假北來道出清江始知前項工程

未經舉辦行過清江以上目睹中河六塘水勢瀾漫探詢邳州宿遷桃源海州贛榆沐陽各屬人民蕩析入東境後

探悉鉅野濟甯嘉祥魚臺金鄉等州縣悉遭淹沒滕嶧濱湖民地與微山獨山南陽諸湖連成一片水面寬至數百里多係黃色江境豐沛湖園地畝亦均淹浸災民四散而自濟甯至宿遷運河南北兩岸長隄衝刷殆盡大勢不可收拾皆石莊戶口門大溜奔注之故詢訪之下不勝焦急茲銷假摺回欽奉

硃批著毋庸來見欽此應卽回任受事就目前要務無有急於此項決口者自應首先籌議復查上年石莊戶口門本係串灘之水僅有大河一二分溜勢聞二三月以後漫水益涸口門甚窄本非必不可辦之工署撫臣文彬之停辦乃因水勢一時之情形無如黃水一經旁洩厯伏經秋

溜勢日漸南趨現在舊時正河業已斷流二十餘里口門  
竟成全河直下漫水窄處數里寬處則數十里至百餘里  
之遠汪洋浩瀚直注東南其由北灘溢入舊河以連張秋  
及從吳家廟分溜以歸大清河者總計不過一二分來年  
漕運經臨時南路過湖則有溯行湍流之阻北路渡黃又  
恐有淺澀膠舟之虞且目前籌辦運道亦屬無從預定至  
被淹民地東省江省各有八九州縣災區過廣尤切隱憂  
就查詢現在決口情形而論實有無從著手之勢然不設  
法籌辦則運道民生利害關係極重十月內兩江督臣李  
宗羲等憑陳河務欽奉寄

諭飭江東直隸河漕各督撫會議奏辦臣甫經回任非不



知河務爲難儘可俟各督撫臣委員查明再爲覈議會奏計時已至來春勢必不及舉辦可以卸責卽明知水患更甚於今日非僅臣一人之過今不俟會議而卽請籌辦無論此時工程之煩難辦理之成敗及辦成後防守之險要責任均在於臣又何必躬蹈艱危甘爲嘗試實因目前水勢民生旣遭沈淪運道已同廢棄此口不堵爲害滋烈若猶觀望因循則上無以對

朝廷下無以對百姓卽安坐衙齋而置數百里運道之淤廢千百萬民生之顛連不爲補救撫心何以自安臣於行抵省垣卽分派委員前往口門一帶詳細確查現接篆後趕將署內公事擇要清理定於十一月初三日帶同熟悉

河務之候補道潘駿文出省親赴石莊戶口門上下游履勘但使有稍可設法之處無論成敗利鈍皆不敢計必當上緊舉辦不敢稍延時日以致再誤惟堵口必須築隄否則堵於上復漫於下築隄必須統籌兩岸否則防於南又疏於北而堵口築隄之費若不先爲籌備則款不應手要工仍不可成查石莊戶口門現在寬約三里大溜湍激不比春閒之寬僅一百數十丈堵築之難十倍於前且正河已淤平二十餘里估挑引河需費甚鉅惟有於迤下水面較窄溜勢稍平及引河略易施功之處相機籌辦冀可節省至堵口既在上近口門之處卽須就該處地勢近水築隄俾上下游一氣聯屬與前修南路之舊隄相去已遠恐

難就用北岸雖有金隄歷年既久殘缺過甚修培亦不足恃且濮范金隄外洶出灘地自一二十里至五六十里亦未便但修舊隄而置灘地於不顧必須近水另建縷隄而以金隄爲遙隄以資北面重障約計南北兩岸各二百五十里共將五百里酌定隄身丈尺其高厚足以禦水每里約需銀五千餘兩五百里之隄約需銀二百五六十萬兩堵口之費此時未經勘定不能懸擬查河工堵禦二百丈之口門約需銀百萬兩引河尙不在內現約計施功之處口門總在四百數十丈加以略挑引河敷計兩項至省亦約需銀二百萬兩合之隄工約共銀四百餘萬兩較今春辦理已加增兩倍當此經費未充豈易籌此鉅款惟念河

防遇必應興辦之工卽需費稍多

國家從未吝惜所以爲民捍災禦患計者用意至爲深遠  
今石莊戶奪溜南趨漫水所及關係兩省數十州縣民命  
及運道河湖全局本年一誤功倍大而費倍增足見事機  
之不可失今再不及早籌辦明歲伏秋汎臨淮徐以下實  
屬不堪設想而其閒災區之蠲緩窮黎之賑濟所損於度  
支者更不必問是以此項工需必蒙

聖主垂慈俯准飭撥且所估原係約數尙未遽定如將來  
口門稍易著手或無須挑挖引河則壩工可以節省至築  
隄一節若於去河較遠之處勸諭居民量力資助酌給津  
貼則隄工又可稍省

臣

於款項極知慎重斷不使分毫浮

濫擬請

飭下部

臣

豫爲籌撥有著之款一百五十萬迅速解東務

期年內解到一半來年二三月解齊庶免臨事貽誤

臣

俟

抵工次勘定情形確核工需應否續撥再行陳請至上年

奏准部撥江西兩淮各處銀三十萬兩經署撫

臣

文彬撥

解清江爲防範下游之用

臣

昨行過該處晤署漕

臣

恩錫

詢知前款動用無幾尙存銀二十八萬兩應請仍卽解東

以應急需除俟勘定堵築地方再將詳細情形繪具圖說

陳奏外所有

臣

出省勘辦石莊石決口並請預撥要需緣

由謹恭摺具陳伏乞

皇上聖鑒訓示飭部速議施行再

臣

出省後所有署中日

行公事應委藩司代折代行緊要事件仍包封由臣行次  
核辦合併陳明謹

奏

湖河一帶添設礮船片

同治十三年十月二十八日

再臺灣近已罷兵各省防務均已漸撤東省海防自可稍緩以節經費况值黃河奪溜南趨江東兩省被淹最重之區多係曹州徐州兩府所屬湖團則兩省均有轄境民氣素形獷悍無事之時尙須派營彈壓搜捕當此徧地災民蕩析流離飢寒交迫兼以明歲交春麥未布種無可指望刻下所恃以安撫者惟有賑濟耳災區過廣款項幾何其勢豈能持久設有不逞之徒勾結煽惑倉卒即可召亂咸豐五年銅瓦廂決口漫淹東省曹屬之長槍會匪江南徐屬之幅匪乘勢蠭起重煩兵力者數年此其明證是東省目前之患不在海疆而在內地

臣

所以必籌河務而不敢

稍避艱難者實在於此現已函致兩江督臣李宗義派撥

勇營礮船駐紮江東交界聯絡彈壓爲先事預防之計惟

東省現在湖河一片寬長皆數百里僅有礮船二十餘隻

不敷分布

臣

擬再添設礮船三十隻擇要布置巡防以期

周密司庫本年存款詢據藩司面稱統計入不敷出約五

十餘萬兩較前數年已形短絀若將來河工有機可圖周

轉殊形掣肘計惟與該司竭力圖維冀可有備無患至海

防一事

臣

亦不敢以現在無事遠圖苟安容俟規畫久遠

漸次籌辦庶期被此兼顧謹附片具奏伏乞

皇上聖鑒訓示謹

奏